

a **33** anni

Via Crucis di Gesù Cristu
scrittura sicilianu
di
Giuseppe Cardella



2021

a **33** anni

Via Crucis di Gesù Cristu
scrittu nsicilianu

di
Giuseppe Cardella

2021

Li dipinti di la Via Crucis, foru rializzati
di l'auturi Giuseppe Cardella

2017 - Mondo Onirico - Via Crucis
acrilico su tela di juta - cm 60 x 90



PRIFAZIONI

Vogghiu cuminciari sta prifazioni nnanzittutu ringraziannu l'amicu Peppi Cardella pi la cunsiderazioni chi dimustrau versu la me pirsuna, la cosa mi lusinga di un latu ma di l'àutru mi jinchi di rispunsabilità. Scriviri trasennu nta l'universu di un artista è cosa assai faticusa e Cardella rappresenta un cuncinratu d'Arti, un munnu tuttu d'iddu dunni truvati sentimenti veri ed emozioni cu lu puddu di lu cori.

La cosa certamenti chi merita attinzioni è senza dubbiu lu curaggiu di Peppi Cardella a usari lu nostru idioma siculu, la nostra matri lingua, pi scriviri st'opira chi presenta na trama ortografica di spissuri, cosa chi fa pinsari a lu granni studiu chi l'auturi fici 'n capu a sta materia.

Lu tema affruntatu è univirsali, pirchi quannu si parra di Cruci e di Cristu si parra di nuatri, di la società chi spissu cunnanna, metti 'n cruci e giudica facennu addivintari la vita na strata versu lu calvariu. Lu litturi liggennu li vari passi di stu libru nun po chi videri nta lu violu chi Peppi Cardella traccia cu la passioni di cridenti.

Putissi pariri comu na traduzioni di li sacri Vanceli nveci ni truvamu davanzi a na vera e propria prosa puetica dunni l'auturi ci misi, oltri a lu mpignu,

puru tutta la puisìa chi curtiva dintra la so arma squeta.

La stessa cruci, simbulu di sta pubblicazioni, è fruttu di la so vina artistica, di na ricerca cuntinua di lu propriu IU nta lu granni jardinu di lu munnu dunni Cardella simina e ricogghi li frutti chiù boni. Li stazioni si lègginu tutti di un ciatu pirchí l'auturi arrinesci cu mastria a dari a ogni frasi na liggirizza spiccata chi li putissi lèggiri senza prublemi puru lu litturi italo fonu chiù ncaddutu. Ntra li rica di sti pagini ci truvai nun sulu lu talentu artisticu ma soprattutto lu fiutu artisticu di Peppi pirchí pi arrivari a sta qualità lirica e ortografica, oltri a lu talentu, ci voli lu fiutu, capiri soccu pi veru voli la genti e la genti di sti tempi si sta arrè nnamurannu di la cultura pupulari, di la matri lingua pirchí ddocu ci trova lì soi ràrichi.

La biddizza di la lingua siciliana pruposta nta stu libru duna un ammuttuni suverchiu a tutta l'opira chi trasi dintra lu litturi cu la forza di un macisti e lu scoti, lu signa nta l'arma. La via di la Cruci è sempri difficili d'accittari, dici l'auturi, ma la cosa chi nesci fora liggennu lì soi riflissioni è la trasfurmazioni di la Cruci in qualchi cosa di fermu, un locu dunni la vita vinci sempri a lu duluri e a la morti.

È pi veru d'apprezzari lu sforzu di Peppi Cardella,

chi cu st'opira si piazza tra li scrittura chiù curaggiusi, lu dissi prima, ma puru tra chiddi chiù purtintusi di la nostra Sicilia.

Prima d'iddu un certu Vitu Lumia publicau na grammatica e un rumanzu tutti scritti 'n sicilianu. Iu chi sugnu un culturi di la lingua siciliana mai haiu pinsatu di scriviri, oltri a la puisìa, qualchi cosa cumplitamenti cu l'idioma siculu. Ed ora liggennu sta fatica littiraria di Peppi quasi ci staiu truvannu stimuli mpurtanti.

Scriviri, lu sapemu, è sempri cumpliatu pirchè usari palori pi spiegari un sintimentu o n'emozioni risurta na mprisa tosta ma Peppi, nta lu granni mari di li palori, ci navica cu na liggirizza chi nun havi uguali. Stu travagghiu, sulu l'urtimu di tanti già publicati, sicunnu la me mudesta opinioni avissi a jiri prestu dintra li scoli pi dari a li nostri studenti certi nsignamenti chi ormai nun si usanu chiù, certi prìncipi di la vita chi na vota, puru pi mezzu di la fidi, eranu punti fermi nta la furmazioni di ogni cristianu.

Mi cumplimentu cu Peppi Cardella pi stu libru chi sta rijalannu a la so comunità, nun sulu chidda di Ribera, paisi girgintanu dunnì sta, ma a tutta la comunità siciliana pirchè nun parra di lu munumentu di la chiazza, parra di sintimenti, di fidi, parra di la Cruci e chisti sunnu argomenti chi

ntiressanu paru paru a tutti.

Iu speru sulu di esseri capaci a ntrippitari st'emozioni, sti sentimenti accussì comu l'auturi ni li presenta, cu semplicità e saggizza, virtù sempri menu 'n vista chi poi fannu sempri la diffirenza. Lu me grazi pi la stima dimustrata va a l'auturi chi speru putissi ristari cuntentu di sti quattru palori chi mpiattai pi prisintari stu so travagghiu pacinziusu e precisu chi certamenti miritava chiossai.

Nino Barone

RICINSONI

Sta vota, Giuseppe Cardella torna ncapu lu tema riligiusu, affruntannu cu un slanciu e tanta suffirenza, la passioni di Gesù.

Taliata e travirsata comu spirienza di vita, nun sulu pi iddu, ma pi uffrilla a li siciliani e a lu munnu, nni la sula lingua ca lu rappresenta beni, lu sicilianu.

È propriu ddocu ca li so sentimenti si colòranu e si còllacanu forti di li so spressioni nativi e comu nta li so poesii, rènninu ogni scena viva ntensa, quasi riali.

Li stazioni, sunnu travirsati di li so emozioni comu crunista attentu e fannu nàsciri riflessioni ca sunnu n'invitu all'umanità a crìdiri nni lu pirdunu e nni la ridenzioni.

“La via di la cruci” è lu passagiu di la vita tirrena fragili e debuli, discritta taliannu Gesù comu spirazioni di salvizza pi iddu e pi l'umanità.

Lu sicilianu, jùnci forza sprissiva ca duna a lu missagiu di Giuseppe Cardella, veru pregiu di tuccanti raccontu.

Giuseppina Taddei

Cummentu

Travagliu cumplicatu e vivu ca dici a lu litturi di taliari propriu ‘nfunnu la granni fidi di lu populu sicilianu.

Liggennu ‘sti pagini, lu litturi avi n’occhju a la Cruci e l’atru a lu celu, pirchi’ l’autùri jietta nni lu cori di tutti un vannù universali di saggizza e amuri arricchutu di li nostri beddi paroli siciliani.

E càpita propriu accussi’ ca mentri scrivu ‘stu cummentu, mi sentu di ringraziari l’amìcu Peppi pi lu priziusu travagliu ca ti solleva finu n’celu, facènnuti capiri la mpurtanza di la vita e di la fidi.

Granni òpira pi Rivela e pi tutti li cristiàni, ca putissi tràsiri ni lu cori di tutti pi fàrini riflèttiri cu semu e taliari soccu putemu fari pi ‘stu munnu ‘nteru.

Angela Campo



Giuseppe Cardella n'arti "cila"

Nascita, morti e risurrezioni di Gesù Cristu

Gesù nasci a Betlemme di Giudea, a lu tempu di re Erode. so Matri è Maria Vergini e Giuseppi è lu so sposu, patri putativu di Gesù. Tri re Magi vinuti di l'orienti a Gerusalemme dicìvanu: Unnè lu "Re di li Giudei".

Vittimu spuntari la so stidda e vinnimu a adurallu. A sentiri chissu lu Re Erode ristà turbatu e cu iddu tuttu lu populu di Gerusalemme. Prioccupatu Erode, riunì tutti li capi, li sacirdoti e òmini di cultura di lu populu pi sapiri lu logu di 'sta nascita. Tutti cci rispunneru: "A Betlemme di Giudea, pirchè cussì fu scrittu pi mezzu di lu Prufeta". Nuddu lu sapiva, ma Gesù fu mannatu di lu Patri Eternu pi sarvari lu munnu e a tutti natri piccatura. Di granni fici tanti miraculi. Di lu re Erode e di li sudditi era udiatu, pirchè lu re sintiva diri ca Gesù era lu Misìa, lu re di li Giudei e vinni ncapu la terra pi cumannari. A l'età di trentatrè anni, Gesù capì ca lu mumentu difficili pi iddu stava arrivannu. Unu di li dudici apostuli e pricisamenti Giuda Iscariota si nni ji nni li capi sacirdoti e cci dissi: "Quantu mi dati si vi cunsignu a Gesù?". Li sacirdoti dissiru ca cci dàvanu trenta dinàri d'argentu. Giuda accittà l'offerta, e di ddu

mumentu m'poi, circava lu mumentu propèziu pi cunsignariccillu. Lu primu jornu di l'Azzini, li discepoli avvicinaru a Gesù e cci dissiru: "Unni vo ca priparamu pi tia, pirchè tu po manciari la Pasqua?". Gesù rispunni: "Jiti ncittà nni un tali e cci dicitu: "Lu Maestru dici: lu me tempu è vicinu: fazzu la Pasqua nni tia cu li me discepoli".

Ficiru pi comu urdinà Gesù e preparararu la Pasqua. Nna sira, Gesù si misi a tavula cu li dudici apostuli, mentri manciàvanu dissi: "Pi virità iu vi dicu, unu di vatri 'sta sira mi tradirà" e tutti rattristati, ognunu cumincià a diri: "Sugnu forsi iu, Gesù?", e Iddu rispunni: "Chiddu chi misi cu mia la manu nni lu piattu, è chiddu ca mi tradirà " Giuda dissi: "Sugnu forsi iu?".

Gesù cci rispunni: "Tu lu dicisti". Mentri manciàvanu Gesù piglià lu pani, recitò la benedizioni, lu spizzà e, mentri lu dava a li discepoli, dissi: «Pigliati e mangiati: chistu è lu me corpu». Po piglià un calici di vinu, resi grazii e lu detti a iddi, dicennu: «Viviti tutti, pirchè chistu è lu me corpu e lu me sangu dill'allianza, ca è virsatu pi tanti pi lu pirdonu di li piccati. Po rivulgènnusi a Petru dissi: "Nni la virità, iu vi dicu: " Prima ca lu gaddu canta, tu Petru mi rinnighirai tri voti". Petru cci rispunni: Anchi si duvissi, iu murissi cu tia, iu nun ti rinnigherò mai. Lu stessu dissiru tutti li

discepoli.

Mentri ancora Gesù parlava, eccu c'arriva Giuda unu di lì dudici apostuli e nzemmula a iddu li surdati di Erode cu appressu na fudda di genti cu vastuna e spati mannati di lì capi sacirdoti e di l'anziani di lu populu. Giuda, lu tradituri, avìa datu un giustu segnu dicennu: "Chiddu chi cci dugnu na vasata, è Gesù, lu putiti arristari".

Sùbitu s'avvicinà a Gesù e lu vasà. A mumentu li guàrdii si ficiru avanti, acchiapparu a Gesù e l'arristaru. Fu purtatu davanti a li sacirdoti e a tuttu lu populu.

Petru ntantu si nni stava assittatu fora, nni lu curtigliu. Na serva s'avvicinà a Petru e cci dici: "Puru tu èratu cu Gesù, lu Galileu!". Ma Petru nigà davanti a tutti dicennu: "Nun capisciu chiddu chi dici". Mentri niscìva versu l'àtriu, lu vitti natra serva e cci dici: "Tu èratu cu Gesù, lu Nazarenu". Ma iddu nigà arrè, giurannu: "Nun canusciu dd'omu!". Dopu un pocu, li prisenti s'vvicinaru e dissiru a Petru: "È veru, puru tu si unu d'iddi: Petru cumincià a mpricari e a giurari:" Nun canusciu dd'omu! ". Nni ddu mumentu un gaddu si misi a cantari. Petru si ricordà chiddu chi dissi Gesù: "Prima ca lu gaddu canta, tu mi rinnighirai tri voti". Niscì fora e cumincià a chiànciri amaramenti.

Li capi sacirdoti e tutti lu sinètriu circàvanu na calunia contru Gesù pi mèttilu a morti, ma nun la trovàvanu, a chista si presentarù tanti atri farsi testimoni.

Dopu tanti e tanti, si presentà unu ca affermà ca Gesù dichiarà: "Iu pozzu distruggiri lu tempiu di Diu e ricustruillu in tri iorna". Lu sommu sacirdoti si misi a l'adritta e cci dissi: "Un rispunni nenti?". Ma Gesù taciva. Allora lu sommu sacirdoti cci dissi: "Dicci si ssì tu Cristu, lu figliu di Diu". "Tu lu dicisti rispunni Gesù, anzi vi dicu: d'ora m'poi viditi a mmia assittatu a la destra di Diu Patri Onniputenti.

Vinni la matina, tutti li capi sacirdoti e l'anziani di lu populu tinniru cunsigliu contru Gesù pi fallu mòriri. Lu ncatinaru e lu purtaru davanti lu guvirnaturi Pilatu. Allora Giuda chiddu ca lu tradì, vidennu ca Gesù fu cunnannatu, presu di lu rimorsu, ripurtà li trenta dinàri d'argentu a li sacirdoti dicennu: Haiu piccatu, pirchè tradivu un sangu nnuccenti". Ma li sacirdoti dissiru: "A natri nun ci ntiressa, pènzaci tu!". Giuda allora jiettà li trenta dinàri nni lu tempiu po, s'alluntanà e si ji a mpiccarì.

A Gesù, ntantu, lu misiru davanti lu guvirnaturi Pilatu, lu quali cci dissi: "Tu si lu re di lì Giudei?". Gesù rispunni: "Tu lu dici", mentri li capi sacirdoti

e l'anziani l'accùsanu, Gesù nun rispunniva, allora Pilatu cci dissi: "Nun senti quantu tistimunianzi sunnu contru a tia?". Gesù un dissi mancu na parola a favuri só.

Ogni festa, Pilatu, libirava un carzaratu a scègliri era la genti di lu populu. L'ùrtimu c'avìvanu carzaratu era un famusu latruni di nomu Barabba, perciò a la genti chi s'avìvanu radunati, Pilatu cci dissi: " Cu vuliti ca iu libiru pi vatri, Barabba o Gesù chiamatu Cristu?". Tutti rispunneru: "Barabba, Barabba".

Allura Pilatu chiesi a lu populu: "Ma allura chi a fari cu Gesù", "Crucifissalu!". E iddu dissi: "Ma chi mali ha fattu?" Lu populu, allora, gridava cchiù forti: "Crucifissalu, crucifissalu". Pilatu, vistu ca Gesù un s'addifinnia e lu populu era troppu agitatu, si fici purtari na bacinella d'acqua e si lavà li mani davanti la genti, dicennu: " Nun sugnu rispunsabili di 'stu sangu. Pinzàtici vatri".

Tuttu lu populu rispunni: "Lu so sangu ricadissi ncapu di natri e li nostri figli". Allora Pilatu libirà Barabba, dopu fici flagillari Gesù, lu cunsignà a li surdati pi mèttilu ncruci. Li surdati di Pilatu, pigliàru a Gesù, lu spugliàru cci misiru un mantellu scarlattu, ntricciàru na curuna di spini e cci la misiru ntesta. Po si cci ngnucchiàvanu davanti e lu sfuttivanu dicènnucci: "Salve re di li

Giudei" e cci sputàvanu nni la facci. Dopu cci livaru lu mantellu e cci misiru lì so vesti, e lu purtaru nni la via pi crucifiggilu.

Mentri caminava, li surdati lu frustàvanu a sangu. Mentri niscìvanu ncuntrararu n'omu di Cirene chiamatu Simuni lu Cirineu e lu custringeru a purtari la cruci. Jiunti nni lu logu di Gólgota, ca significa "Logu di lu craniu" cci detturu a viviri vinu ammiscatu cu lu feli. Iddu l'assaggià ma nun si lu vippi.

Dopu ca lu misiru ncruci si sparteru lì so vesti, tirànnuli a sorti, po assittati cci facìvanu la guardia. Ncima a la cruci pi lu mutivu di la so cunnanna, cci scrissiru: "INRI" (Re di li Giudei). Nzemmula a Iddu crucifissaru puru a du latruna, unu a destra e unu a sinistra. Chiddi ca passàvanu di ddà lu nzurtàvanu dicènnucci: " Tu ca distruggi lu tempiu e lu costruisci nta tri jorna, sàrvati tu stessu? Si tu si lu figliu di Diu, scinni di 'sta cruci e sàrvati! Puru li sacirdoti si facìvanu beffa d'Iddu dicennu: "Hai sarvatu a tanti, sàrvati tu stessu! Scinni di la cruci, accusi sulu ti putemu crìdiri".

A mezzuornu nta chi c'era lu sulì, tuttu nzemmula lu celu si fici niuru, scurà nni tutta la terra, finu a li tri di pomiriggìu. Dopu li tri, Gesù gridà cu tutta la so forza: "Eli, Eli, lemà sabactàni? , ca significa: "Diu miu, Diu Miu, pirchè m'abbannunasti?"

Sintennu chistu, quarchi passanti diciva: " Chistu chiama a Elia". Sùbitu quarcunu d'iddi piglià na spugna la nzuppà d'acitu la misi ncima a na canna e cci dava a vùviri. Atri nveci dicìvanu: "L'assati iri, videmu si veni Elia a sarvallu".

Mentri Gesù jittà l'ùrtimu gridu, abbassà la testa e murì. Propriu nni 'stu mumentu si ntisi un buatu, la terra trimà, lampi, trona, acqua e ventu nun cissaru. Li cinturiuna e li surdati ca facìvanu la guardia a Gesù, a la vista di lu tirrimotu e di chiddu chi successi, si pigliaru di scantu dicennu: "Chistu è veramenti lu figliu di Diu".

Sutta la cruci c'èranu tanti fimmini, c'era so matri Maria di Màgdala, c'era puru Maria matri di Giacumu e di Giuseppi, e la matri di lì figli di Zebedeo. Vinni la sira e arrivà Arimatea, chiamatu Giuseppi; Puru Iddu era divintatu discepulu di Gesù. Giuseppi si presentà a Pilatu e chiesi lu corpu di Gesù. Pilatu allura urdinà ca cci fussi cunsignatu Gesù. Giuseppi piglià lu corpu, lu cummiglià nni un linzolu pulitu e lu pusà nni lu so sipolcru novu, ancora senza usatu, si l'aviva fattu scavari nta na roccia; po la chiudì cu na granni petra all'entrata di lu sepolcru e si nni ji. Assittati sutta la cruci c'èrano so matri Maria di Màgdala e l'altra Maria.

Lu iornu siguenti lì sacirdoti si riuneru pressu

Pilatu facènnucci ricurdari ca Gesù avìa dittu ca dopu li tri jorna avìa a risuscitari, perciò cci chiesiru di mèttiri tanti guàrdii nni lu sipolcru di Gesù, accussì nun l'avissiru tuccatu nuddu. Pilatu dissi: "Aviti li guàrdi, jiti e assicurati la surveglianza comu megliu putiti. Sacirdoti e guàrdii cci eru e pi stari la tomba cchiù a lu sicùru, siggillaru la petra e tutti li guàrdii si cci misiru attornu.



La Croce della fede

La Cruci di la fidi

Descrizioni di “La Cruci di la fidi”

La rializzazioni di “La Cruci di la fidi” nascì di nna frasi ca tempu fa avìa maturatu nni la me menti: “Scinnisti pì beni – Acchianasti cu li peni”. Lu pinseru è rivoltu a Gesù Cristu, ca scinnì pi fari beni nni la terra, ma purtroppu fu Crucifissu e murì ncruci, suffrennu, pi lu munnu nteru, tantissimi peni.

'Sta frasi mi la mmaginavu scritta nta la cruci. Di chissu nascì l'impulsu di circari dù pezzi di ligna e sciivicci ncapu. Dopu tanti ricerchi, trovavu chiddu chi disidirava. Di ddi dù pezzi di lignu nun ci fici nenti, chissu era lu me pinseru fissu. L'avìa a truvari a giusta misura. Lu me còmputu avìa a èssiri sulamenti chiddu di jùngili pi furmari nna cruci. Dopu ivu a la ricerca di li rovi pi rializzari la curuna di spini e di li chiova di ferru quatrati. Furmavu la cruci e l'attaccavu cu nna pocu ri rami d'ulivu e di granatu. Dopu ivu a la ricerca di lu piedistallu, puru iddu avìa a èssiri naturali senza fàricci mudifichi. Truvavu la petra ca disidirava. Eccu la Cruci finuta, era precisa comu era nni la me menti. La taliava e iu stessu ristava miravigliatu, vidìa comu si cci fussi Gesù Crucifissu, cu so matri Maria addulurata ca nginocchìu chianciva a li so pedi.

Eccu lu suggirimentu, l'ispirazioni di scrìviri quarchi cosa ca ricurdassi lu sacrificiu e li suffirenzi di Gesù Cristu e di prigàri pi iddu e pi lu munnu nteru.

Accussì nascì la poesia "Prighiera". Pi mia l'òpira nun nn'era ancora cumpleta, circava lu logu e lu celu adattu pi mmurtalari 'stu me lavoru. Nun fu tantu facili truvalli. A la fini, dicisi ca lu postu cchiù adattu avìa a èssiri propriu lu calvariu di Rivela. Aspittava, iornu dopu iornu ca lu celu avissi divintatu nuvulusu e un iornu capitò ca era pi comu vuliva iu.

L'òpira finuta, ora, si trova, pi dunazioni, nni la chesa Matri di Rivela.

2007 Giuseppe Cardella

Ntroduzioni

La via di la cruci è sempri dura di accittari e di cundivìdiri. Ma la via di la cruci è puru na via d'amuri. Diu si fa cumpagnu di viaggi nni lu duluri. Nun lassàmucci vùnciri di la suffirenza ca accumpagna li nostri iurnati.

Guardamu a la cruci nun rifiutannu la spiranza di un Diu ca nun cci abbannuna mai. Via di la cruci, via d'amuri, via di spiranza. Sulu nni ddu crucifissu nni sintemu tantu amati e accolti. Nuddu po taliari dda cruci e sentisi ndifferenti a ddu duluri. Iddu è lu duluri di n'amuri ca si fa donu, prighiera, accuglienza e cundivisioni.

Diu è dda e cci aspetta. Nni chissa Via crucis tanti ntirrugativi indiretti pi la nostra vita, pi dari na svolta e pi èssiri divisi nni lu camminu versu la cruci quotidiana. Nni la cruci cci ritruviremu tutti frati e cumpagni.

.....

Prima stazioni.

Gesù è cunnannatu a morti



Pilatu dissi a lu populu: "C'affari allura di Gesù?" Dopu si rivulgì a Gesù e cci dissi: "Pirchì nun rispunni? Dimmi sì tu lu "Misìa? Lu figliu di Diu? Re di lì Giudei?". Gesù cci rispunni: "Si, tu lu dicisti, anzi vi dicu ca fra li nuvuli di lu celu saró a lu sciancu di la Maestà Divina". A stu puntu Pilatu rivulgènnusi a lu populu dissi: "Lu sintìstivu chi dissi? Ha bistimmiatu, chi diciti vatri?". Tutti cci rispunneru: "Mèttilu ncruci". E Pilatu dissi: "Ma chi mali ha fattu? Lu populu alzannu lì mani gridà:" Mèttilu ncruci, mèttilu ncruci". Allora Pilatu lassà libiru Barabba e fici flagillari Gesù e lu cunsignà a li surdati pi mèttilu ncruci.

.....

Miditazioni

Lu giudici di lu munnu, ca un jornu riturnirà a giudicari tutti natri, 'sta dda, annientatu, disunuratu e inermi davanti a lu giudici tirrenu. Pilatu nunn' è un mostro di malvagità. Sapli ca 'stu cunnannatu è nnucenti; cerca lu modu di liberallu. Ma lu so cori è divisu. E a la fini fa privaliri su lu dirittu la so pusizioni, iddu stessu. Anchi l'òmini ca gridanu e chièdinu la morti di Gesù nun sunnu mostri di malvagità. Tanti d'iddi, lu iornu di lì Pentecoste, si sin-

tirannu “trafiggiri lu cori”, quannu Petru dirà a iddi: “Gesù di Nazareth – omu accreditatu di Diu pressu di vatri. Vatri lu nghiuvàstivu nni la cruci pi manu di èmpii.

.....

Riflessioni

Na cunnanna ca pisa. La cunnanna di un nnuccenti. Tu, omu senza curpa, cunnannatu pi la nostra salvizza.

Quantu voti un cunnannatu giudica a l'atru senza canùsciri mancu la virità di li fatti. Quantu voti nun sapemu taliari li pirsuni nta ll'occhi, ma si finisci cirtamenti a giudicalli.

Gesù, lu figliu di Diu, ngiustamenti cunnannatu, si lassà giudicàri e prucissari di l'umanità. Firmà-mucci nni chista prima stazioni a rintracciari la nostra cuscenza tutti li voti ncui avemu giudicatu ngiustamenti a l'atri.

.....

Secunna stazioni

Gesù è caricatu di la cruci



Li surdati di Pilatu purtaru a Gesù di na stanza, l'atturniàru, lu spugliàru, ntesta cci misiru na curuna di spini. Po' lu sfuttìvanu dicènnucci: "Salve re di lì Giudei".

Cci sputàvanu di ncoddu e cci dàvanu nirvati nni li spaddi e nni lu pettu a carni viva. Po lu visteru di lì so robbi e cu la cruci ncoddu cumincià lu pinusu camminu versu la crucifissioni.

.....

Meditazioni

Gesù, cunnannatu comu un sidicenti re, veni dirisu, ma propriu ni la dirisioni emergi crudelmenti la virità. Gesù, chiddu ca veni dirisu e ca porta la curuna di la suffirenza, propriu pi chistu è lu veru re.

Iddu, lu veru re, nun regna tramiti la viulenza, ma tramiti l'amuri ca soffri pi natri e cun natri. Iddu porta la cruci ncapu d'iddu, la nostra cruci, lu pisu dill'èsseri òmini, lu pisu di lu munnu. È accussì ca iddu cci pricedi e cci mostra comu trovarli la via pi la vita vera.

.....

Riflessioni

È nna cruci pisanti. Na cruci ca parla di dulura, ma anchi d'amuri. L'ha sciglisti pi la nostra salvizza. Spessu vulemu evitari la nostra cruci quotidiana. Nun sapemu comu e unni truvare la forza pi accoglila e supportalla.

Tu nveci si cca, Gesù, ti fazzu caricu di dda cruci cu tutti li to forzi: sicuramenti hai ntisu comu natri lu scantu e lu sgumentu, eppuru Nun nn'hai esitatu, pirchi dda cruci nun parla di na scunfitta, ma di la vittoria di l'amuri su lu duluri.

.....

Terza stazioni

Gesù cadì pi la prima vota



Eppuri iddu si è caricatu di li nostri suffirenze, s'addussà li nostri dulura e natri lu giudicàvamu castigatu, malutrattatu e umiliatu di Diu.

Iddu fu trafittu pi li nostri dilitti, pi li so piaghi natri fomu guaruti. Tutti natri èramu persi comu un greggi, ognunu di natri siguivamu la so strata. Lu Signuri fici ricàdiri nni iddu la malvagità di tutti natri.

.....

Miditazioni

La caduta di Gesù sutta la cruci un nn'è sultantu la caduta dill'omu, Gesù già sfinitu di la flagillazioni. Cca emergi quarchi cosa di cchiù prufunnu, comu Paulu dici ni la littra a li Filippesi: “Pur essennu di natura divina, nun cunsidirà un tisoru gilusu la so uguaglianza cu Diu, ma si spuglià iddu stessu, assumennu la cundizioni di servu e divinennu simili a l'òmini, si umilià iddu stessu facènnusi ubbidienti finu a la morti e a la morti di la cruci”

.....

Riflessioni

La prisenza di la cruci ti fa crullari. Nun nnè un pisu supputabili.

La cruci ti scaccia. Anchi natri semu scacciati di macigni di na cruci ca certi voti cci ferma anchi lu rispìru. Nun nnè semplici supputari certi dulura, affruntari certi malatii, ma tu nun t'hai lassatu suffucari di lu duluri e hai ripresu lu camminu pi cundivìdiri lu pisu di la nostra cruci.

.....

Quarta stazioni
Gesù incontra la madre



Nni l'acchianata a lu calvàriu, Gesù vitti a so matri.
Li sguardi si ncruciàru. Maria sapi ca è so figliu,
sapi dunni veni, sapi qual'è la so missione.
Lu vidi sòffriri pi tutti l'òmini di aieri, di oi e di
dumani. E soffri puru idda.

.....

Miditazioni

Nni la Via crucis di Gesù c'è puru Maria, so matri.
Duranti la so vita pubblica, si misi di parti, pi
lassari spàziu a la nascita di la nova famiglia di
Gesù e a la famiglia di lì so discepoli. Ora si vidi
ca idda, è nni lu corpu, e nni lu cori, è veramenti
la matri di Gesù.

Ancora prima di avillu cuncipitu nni lu corpu,
grazii a la so ubbidienza, l'aviva cuncipitu nni lu
cori. Cci dissiru: “Tu cuncipirai un figliu, arà
granni, lu Signuri Diu cci darà lu tronu di Davidi
so patri”. Ma pocu dopu aviva ntisu di la vucca di
lu vecchiu Simiuni natra parola: Anchi a tia na
spata trafiggirà l'anima”. Accussì sarà ricurdata di
li paroli pronunciati di lì prufeti, paroli comu
chisti: “Maltrattatu, si lassà umiliari e nun grapì la
so vucca; era comu n'agneddu purtatu a lu

macellu”. Ora tuttu chistu diventa rialtà. Nni lu so cori avrà sempri custuditu la parola ca l'àngiluu l'aviva dittu quannu tuttu cumincià: “Nun temèri, Maria” Li discepuli scapparù, idda nun scappa. Idda sta dda, cu lu curaggiu di la matri, cu la fidiltà di la matri, cu la buntà di la matri, e cu la so fidi, ca risisti nni la scurità: “Biata chidda ca ha cridutu”. “Ma lu Figliu dill'omu, quannu virrà, truvirà la fidi nni la terra?”. Sì, a 'stu mumentu iddu lu sapi: truvirà la fidi. Chista è la so granni cunsulazioni.

.....

Riflessioni

Un figliu e na matri. Na scena ca nni lassa sgumentu. Un figliu ricupertu di piaghi, nsanguinati, na matri ca chianci, na matri ca voli strapparri a dda cruci so figliu, lu so amatu figliu.

Na scena ca si ripeti ogni iornu. Quantu matri strazianti di lu duluri di l'è propri figli. Assittati vicinu a lu so lettu, mputenti davanti a na malatia gravi e difficili. E ddu figliu ca strinci la manu a la mamma, un figliu ca cunsola la matri e voli d'irrici: "Iu cci sugnu e sugnu cca, mamma. Nun suffriri pi

mia, vinciremu 'sta battaglia".

Maria è Gesù su du volti ca si ncòntranu, la Spiranza e l' Amuri, la spiranza di nna matri e l'amuri di un figliu ca voli attraversari lu duluri di li piccati di l'umanità.

.....

Quinta stazioni

Gesù è aiutatu di lu Cirineu a purtari la cruci



Gesù è stancu, lu so passu si fa sempri cchiù lentu,
li surdati hannu prescia di arrivari e lu frùstanu
cchiossà. Appena nisciuti di lu paisi, dopu la porta
Giudiziaria, vidinu n'omu chi riturnava di la
campagna. Era Simuni lu Cirineu,
lu chiamaru e lu custringeru a purtari la cruci.

.....

Miditazioni

Simuni di Cirene torna di travagliari, è nni la strata
di casa, s'imbatti nni ddu tristi curteu di cunnan-
nati. Li surdati lu chiàmanu e cci mèttinu la cruci
ncoddu a iddu. Di 'stu ncontru nvuluntàriu a
Simuni cci nascì la fidi, accumpagnannu Gesù e
cundividennu lu pisu di la cruci, lu Cireneu capì
ca era na grazia putiri caminari nzemmula a' stu
Crucifissu e assistilu.

.....

Riflessioni

Gesù cadisti na vota e 'stu pisu nun diventa certu cchiù liggeru. Si cerca quarcunu ca ti putissi aiutari. Un Cirineu, n'omu ca putissi purtari cu tia 'stu pisu.

Li forzi vennu menu quannu la cruci si fa cchiù pisanti. Quantu nfirmèri, duttura, familiari, amici e parenti di malati si fannu cirinei ti tanti cruci rifissioni di la nostra storia. La cruci a li voti pó èssiri nsupportabili pi na pirsuna sula, ma propriu allura po truvare du occhi ca ti capiscinu, du occhi ca sannu parlari d'amuri; e ddocu ca ti vidi gràpiri lu celu e cogli la biddizza di lu paradisu n'ogni visu ca ncrocchia lu to sguardo.

.....

Sesta stazioni

La Veronica asciuca lu voltu di Gesù



Veronica è, secunnu la tradizioni cristiana, la fimmina piatusa ca vidennu passari Gesù cu la cruci ncoddu e la facci tutta nsanguliata e china di suduri lu stuià cu un pannu di linu, si dici ca cci arristà l'impronta di la facci di Gesù (lu cusiddettu velu di Veronica).

.....

Miditazioni

La to facci, Signuri, iu cercu. "Nun m'ammucciari la to facci".

Veronica – Berenice, secunnu la tradizioni greca – ncarna 'st'anèlitu ca accùmuna tutti l' òmini pii di l'Anticu Tistamentu, l'anèlitu di tutti l'òmini cridenti a videri la facci di Diu.

Nni la Via crucis di Gesù, comunqui, idda, all'iniziu, nun renni atru chi un serviziu di buntà fimminili: offri un sudàriu a Gesù. Nun si fa né cuntagiari di la brutalità di lì surdati, né immubilizari di la paura di lì discepuli. È l'immagini di la fimmina bona, ca, nni lu turbamentu e nni la scurità di lu cori, manteni lu curaggiu di la buntà, nun permetti ca lu so cori si scurisci. “Biatì li puri di cori, pirchè vidrannu Diu”. All'iniziu Veronica vidi sultantu na facci maltrattatu e signatu di lu

duluri.

Ma l'attu d'amuri mprimi ni lu so cori la veru mmagine di Gesù: nni la facci umanu, chinu di sangu e di firiti, idda vidi la facci di Diu e di la so buntà, ca cci segui anchi nni lu cchiù prufunnu duluri. Sulu cu lu cori putemu videri Gesù. Sultantu l'amuri cci renni capaci di videri e ci renni puri. Sultantu l'amuri cci fa ricanùsciri Diu ca è l'amuri stessu.

.....

Riflessioni

Lu voltu di Gesù è rigatu di sangu e suduri. Lu camminu è ancora longu pi jìungiri a Golgota. Nna fimmina è cummossa davanti a tuttu chistu duluri e voli asciucari ddu visu marturiàtu. Voli mprignari lu so pannu di lu suduri e di lu sangu di Gesù. Si fa largu tra la genti, Gesù havi i bisognu d'idda. Asciuca lu visu e supra ddu pannu ristà mpressu lu voltu di Gesù.

Un dipintu, n'icona di 'stu duluri. Quantu icona di dulura si ncòntranu ogni iornu nni l'ospitali, ma natri nna ma ffari "fazzulettu" càndidu capaci d'asciucari lacrimi, suduri e sangu pirchè nni ogni voltu di dulura, cc'è Gesù.

.....

Settima stazioni

Gesù cadì pi la secunna vota



Pi la secunna vota, mentri avanza pi la via di lu calvàriu Gesù cadì, capemu la so dibulizza fisica, dopu na tirribuli nuttata, dopu lì turturi ca cci ficiru, poviru omu, nun ci la fà cchiù a purtari la cruci ncapu lì spaddi e ogni passu è un turmentu.

.....

Miditazioni

La tradizioni di li caduti di Gesù e di lu pisu di la cruci richiama la caduta di Adamu – lu nostru esseri umanu cadutu – e lu misteru di la parteci - pazioni di Gesù a la nostra caduta.

Nni la storia, la caduta dill'omu assumi formi sempri novi. Nni la so prima littra, San Giuvanni parla di natra caduta dill'omu: la cuncupiscenza di la carni, la cuncupiscenza di l'occhi e la superbia di la vita. È accusà ca iddu, su lu sfondu di li vizi di lu so tempu, cu tutti li so eccessi e pìrvirsioni, intèrprita la caduta dill'omu e di l'umanità.

Ma putemu pinsari, ni la storia cchiù ricenti, anchi a comu la cristianità, si staccà di la fedì, ha abbannunatu lu Signuri: lì granni idiologi, comu la banalizzazioni dill'omu ca nun cridi cchiù a

nuddu si lassa semplicimenti jiri, hannu custruitu un novu paganèsimu, un paganèsimu piggiori, ca vulemu accantunari difinitivamente Diu, finì pi sbarazzàrisi dill'omu.

L'omu giaci ni la polviri. Lu Signuri porta 'stu pisu e cadi, pi putiri vèniri a natri; iddu cci talia pirchè in natri lu cori si risveglia; iddu cadi pi rialzàricci.

.....

Riflessioni

Supputtari lu pisu di la cruci si fa sempri cchiù àrduu, Gesù cadi ancora nna vota.

Nun sempri s'arrinesci a stari mpedi. La vita po èssiri comu un ringni, ca spissu cci fa càdiri a tappetu. Certi voti è forti la tintazioni di ristari nterra, pirchè la lotta si fa sempri cchiu dura. Ma tocca a tia, t'assùsiri: sùsiti, omu di lì dulura, sùsiti ancora nna vota.

Lu camminu è ancora pisanti, ma avemu bisognu di tia nni 'sta longa strata pirchè sulu cu tia putemu sènticci a lu sicùru.

.....

Ottava stazioni

Gesù ncontra li fimmini di Gerusalemme ca
chiàncinu pi iddu



A Gesù, lu siguiva tanta genti, li fimmini si battivanu lu pettu e facivanu lamenti pi iddu, ma Gesù vutànnusi versu d'iddi cci dissi: "Figlie di Gerusalemme nun chiànciti pi mia, ma chiànciti pi vatri e pi li vostri figli.

.....

Meditazioni

Sèntiri Gesù, mentri rimpròvira li fimmini di Gerusalemme ca lu sèguinu e chiàncinu pi iddu, cci fa riflèttiri.

Comu capillu? Nun nn'è forse un rimproviru rivoltu a na pietà puramenti sintimentali, ca nun diventa cunversioni e fidi vissuta? Nun servi cumpiàngiri a paroli, e sintimentamenti, li suffirenzi di 'stu munnu, mentri la nostra vita cuntinua comu sempri.

Pi chistu lu Signuri cci avverti di lu piciculu ncuì natri stessi semu. Cci mostra la sirietà di lu piccatu e la sirietà di lu giudìziu. Nun semu forse, nunus-tanti tutti li nostri paroli di sgumentu di fronti a lu mali e a li suffirenzi di li nnucenti, troppu inclini a banalizzari lu misteru di lu mali? Di l'immagini di Diu e di Gesù, a la fini, nun ammittemu forse sultantu l'aspettu duci e amurevuli, mentri avemu

tranquillamenti cancellatu l'aspetto di lu giudìziu?
Comu putrà Diu fari un dramma di la nostra
dibulizza? – pinsamu.

Semu pur sempri sulu òmini! Ma taliannu a li
suffirenci di lu Figliu videmu tutta la sirietà di lu
piccatu, videmu comu a va èssiri ispiatu finu a la
fini pi putiri èssiri supiratu.

Lu mali nun pò cuntinuari a èssiri banalizzatu di
fronti a l'immagini di lu Signuri ca soffri. Anchi a
natri iddu dici: Nun chianciti supra di mia,
chianciti supra di vatri stessi, pirchè si tràttanu
accussì lì ligna viridi, c'avvirrà di lu lignu siccu?

.....

Riflessioni

Gesù ncontra so matri, ncontra puru la Veronica e
napucu di fimmini, afflitti pi iddu.

L'hannu siguutu di luntanu e sunnu addulurati pi
chiddu chi cci sta succidennu. Eppure Gesù li nvita
a capiri ca lu chiantu nveci a va èssiri pi li so figli
ca nun cumprinnirannu la biddizza e la grannizza
di la forza di Diu ca li voli tutti salvi. Gesù li
mmità a abbannunàrisi a iddu e a guardari la vita
cu spiranza.

.....

Nona stazioni

Gesù cadì pi la terza vota



La strata nsalita è brevi, ma la so dibulizza è estrema. Gesù è sfinutu nni lu fisicu.e nni lu spiritu. Avverti l'òdiu di lì capi, di lì sacirdoti, di la genti ca vonnu scaricàricci di ncoddu a iddu la ràggia pi l'oppressioni passati e presenti, quasi circari na rivincita, facennu valiri lu loru putiri ncoddu a Gesù.

.....

Miditazioni

Chi cci pò diri la terza caduta di Gesù sutta lu pisu di la cruci? Forsi cci fa pinsari a la caduta dill'omu nginirali, all'alluntanamentu di tanti di Cristu, a la diriva versu un sicularismu senza Diu.

Ma nun putemu pinsari anchi a quantu Cristu a va sòffriri ni la so stessa Chesa? A quanti voti s'abusa di lu santu sacramentu di la so prisenza, nni la quali votu e cattiveria di lu cori spissu iddu trasi! Quanti voti cilibramu sultantu natri stessi senza mancu rènnicci cuntutu di iddu!

Quanti voti la so parola veni distorta e abusata! Quantu poca fidi c'è nni tanti tiurii, quanti paroli voti! Quantu spurcizia cc'è nni la Chesa, e propriu anchi tra chiddi chi, nni lu sacerdotiu, avissiru appartèniri cumplitamenti a iddu! Quantu superbia, quantu autosufficienza!

Quantu pocu rispittamu lu sacramentu di la ricun-
ciliazioni, nni lu quali iddu cci aspetta, pi
rialzàrinnii di li nostri caduti! Tuttu chistu è
presenti nni la so passioni. Lu tradimentu di li
discepoli, la ricezione ndegna di lu so Corpu e di
lu so Sangu è certamenti lu cchiù grannei duluri
di Ridinturi, chiddu ca cci trafiggi lu cori. Nun ci
rimani atru ca rivòlgicci, di lu cchiù prufunnu
dill'ànimu, lu gridu: Signuri, salvaci.

.....

Riflessioni

Na cruci purtata finu a lu sfinimentu di li forzi.
Vinissi voglia di diri basta. Possibili ca 'stu
camminu nun finisci mai? Cchiù si va avanti cu la
cruce, cchiù diventa duru caminari lu pircorsu. Ti
veni voglia di annullari.

Tocca a mia sarvàri' stu populu, tocca a mia dari
tutti li me forzi pi iddi. Quannu sintemu ca nun cci
la facemu cchiù, propriu tannu avissimu a rialzari
lu nostru cori versu d'iddu, Versu Gesù. Metti
prima un pedi e po l'atru, li dinocchia nun règginu,
ma si rialza e ancora cchiù forti abbrazza dda cruce
e cuntinua.

.....

Decima stazioni

Gesù è spugliatu di lì vesti



Jiunti nni lu logu chiamato Gòlgota, ca significa logu di lu craniu cci detturu a vùviri vinu ammiscatu cu feli, ma iddu dopu ca l'assaggià nun si lu vippi. Dopu avillu misu nta la cruci, li guàrdii, si sparteru lì so vesti tirànnuli a sorti, mentri cci facivànu la guàdia.

.....

Miditazioni

Gesù veni spugliatu di lì so robbi. Lu vistitu cunfirisci all'omu la so pusizioni suciali; cci d'una lu so postu nni la sucietà, lu fa essiri qualcunu. E'ssiri spugliatu npublicu significa ca Gesù nun è cchiù nuddu, nun è atru ca un emarginatu, disprizzatu di tutti.

Nni lu mumentu ca lu spòglianu cci ricorda anchi la cacciata di lu paradisu: lu splenduri di Diu è vinutu menu nill'omu, ca ora si trova dda, nudu e espostu, dinudatu, e si vrigogna. Gesù, nni 'stu modu, assumi ancora na vota la situazioni dill'omu cadutu.

Lu Gesù spugliatu cci ricorda lu fattu ca tutti natri avemu persu la “prima vesti”, e cioè lu splenduri

di Diu. Sutta la cruci li surdati tiranu a sorti pi
dividisi li so miseri avèri, li so vesti.

Cca nenti è pura cuincidenza, tuttu chiddu chi
accadi è racchiusu nni la Parola di Diu e sustinutu
di lu so divinu disegnu. Lu Signuri spirimenta tutti
li stadi e li gradi di la perdizioni dill'òmini, e
ognunu di 'sti gradi è, ntutta la so amarizza, un
passu di la ridinzioni: è propriu accussì ca iddu
riporta a la casa la picuredda smarrita.

Ricordàmuni puru ca Giuvanni dici ca l'uggettu di
lu surtegiu era la tunica di Gesù, “tissuta tutta
d'un pezzu di cima a funnu”. Putemu cunsidirallu
n' accenno a la vesti di lu sommu sacirdoti, lu
quali era “tissuta di un unicu filu”, senza cucitura.
Lu Crucifissu, è nfatti lu veru summu sacirdoti.

.....

Riflessioni

È juntu lu mumentu di acchianari ncapu la cruci.
Mi pìglianu pirsinu chiddu ca mi pruteggi e
ammuccia la me intimità. Ma oramà nun
appartegnu cchiù a mia stessu.

Mi spugliàru, nun sugnu cchiù n'omu, sugnu un
vermi, mi lèvanu la me stessa dignità. Sugnu un

cunnannatu a morti, Unu ca nun cunta cchiù nenti.
Un diligenti ca va sulamenti ammazzàtu, pi la
quali cc'è sulamenti la cruci.
Pigliàru la me vesti, lurtima cosa chi m'arristà.
Sugnu nudu, quannu mi ìsanu versu lu suppliziu
di la cruci.

.....

Undicesima stazioni

Gesù è nchiudatu nni la cruci



Nni la cruci, ncapu la so testa cci misiru la mutivazioni scritta di là so cunnanna: "INRI" ca significa, Gesù Re di lì Giudei. Nsemmula a iddu foru crucifissi puru dū latruna, unu a destra e unu a sinistra. Chiddi ca passàvanu di dda cci dicìvanu: "Tu ca distruggi un tempiu e lu ricustruisci nni tri iorna, sàrvati tu stessu!

Tu si lu figliu di Diu scinni di la cruci e sàrvati, puru li sommi sacerdoti lu pigliàvanu ngriru, cci dicìvanu: " Si a sarvatu all'atri, pirchè nun ti sarvi tustessu? Scinni ora accussì sulu ti putemu crìdiri"

.

.....

Miditazioni

Gesù è nchiudatu supra la cruci. La sindoni di Torino ci permetti di avìri n'idea dill'incridibili crudiltà di chista prucitura.

Gesù nun vivi la bivanda chi cci uffreru: piglia su di iddu tuttu lu duluri di la crucifissioni. Tuttu lu so corpu è marturiàtu; li paroli di lu salmu s'avviraru: "Ma iu sugnu vermi, no omu, nfamia di l'òmini, rifiutu di lu me populu".

"Comu unu davanti a lu quali cci si copri la faccia, era disprizzatu, eppuru iddu si è caricatu di li nostri suffirenzi, si è addussatu li nostri

dulura”. Firmamuni davanti a 'sta mmagini di duluri, davanti a lu Figliu di Diu suffirenti.

Guardamu a iddu nni li mumentu di la prisunzioni e di lu gudimentu, nmodu di mparari a rispittà li limiti e a videri la superficialità di tutti li beni puramenti materiali. Taliamu a iddu nni li mumentu di calamità e ngustia, pi ricanusciri ca propriu accussì semu vicini a Diu.

Circamu di ricanusciri lu so voltu nni chiddi ca tèdanu a disprizzari. Davanti a lu Signuri cunnannatu, ca nun vosi usari lu so puteri pi scinniri di la cruci, ma cchiuttostu supportà la suffirenta di la cruci finu a la fini. Lassàmuni nchiudari a iddu, nun cidennu a nissuna tintazioni di staccarici e di cèdiri a li beffi chi vulissiru ndùricci a fallu.

.....

Riflessioni

Li primi chiova cci li chiantaru nni li mani. Lu duluri è lancinanti, lu sangu cumincià a nèsciri. Nna suffirenta nsurputtabili; mani trapassati di firiti senza uguali, vrazza aperti pi abbrazzari l'umanità. Li chiova di lu piccatu pèrcianu nun sulu lu corpu, ma anchi l'anima.

.....

Dodicesima stazioni
Gesù morì nni la cruci



Di mezzìó finu a li tri di pomeriggiu scurà nni tutta la terra.

Versu li tri Gesù jittà un gridu cu tutta la so forza dicennu: "Elì, Elì, lemà sabactàni", ca significa: "Diu miu, Diu Miu, pirchè m'abbannunasti,?". Chiddi ca lu sintìvanu gridari dicìvanu: "Chistu chiama Elia". Sùbitu unu di iddi currì a ghiri a pigliari na spugna mbivuta di acitu, la misi ncima a na canna e accussì cci dava a vùviri.

L'atri dicìvanu: "Lassa jiri, videmu si veni veru Elia a sarvallu". Gesù jittà natru gridu e murì. Li centuriuna e tutti l'atri ca facìvanu la guardia a Gesù, vistu chiddu chi era successu e ntisu puru lu tirremotu dicìvanu: "Pi veru chistu era lu figliu di Diu!".

.....

Miditazioni

Ncapu la cruce di Gesù cc'è scritto INRI cioè: Re di Giudei, lu Figliu prumessu di Davidi. Pilatu, lu giudici ngiustu, è divintatu prufeta so malgradu. Davanti all'opinioni pubblica mundiali veni pruclamata la regalità di Gesù. Gesù stessu nun avìa accittatu lu titulu di Missia, nquantu avìa

richiamatu n'idea sbagliata, umana, di putiri e di salvizza.

Ma ora lu titulu pó stari scrittu dda pubblicamenti supra lu Crucifissu. Iddu accusi è pi davveru lu re di lu munnu. Ora è davveru “nnalzatu”. Nni la so discesa iddu acchianà. Ora adèmpì a lu mannatu di l'amuri, cumpì l'ufferta di iddu stessu, e propriu accusi iddu ora è la manifestazioni di lu veru Diu, di ddu Diu ca è l'amuri. Ora sapemu ca è Diu. Ora sapemu com'è la vera regalità.

Gesù prega a so patri: “Diu miu, Diu miu, pirchè m'abbannunasti?” La cruci di Gesù è n'avvenimentu cosmicu. Lu munnu si oscura, quannu lu Figliu di Diu subisci la morti. La terra trema. Lu cinturiuni rumanu ricanusci, capisci ca Gesù è lu Figliu di Diu. Di la cruci iddu trionfa, sempri.

.....

Riflessioni

Finì. Sugnu sulu cu lu Patri, a iddu mi cunsignu. L'amaru finu a la fini, Finu a dari l'urtima goccia di lu me sangu.

Gesù s'abbannuna nni li vrazza di lu patri, mentre veni abbannunatu di tutti. A li sò pedi rèstanu sulu

so matri e lu discepulu. Dopu avìri cunsignatu l'unu all'atra, cunsignà la so anima a Diu. Lu celu si fa scuru, è buiu, pari notti, Quannu tuttu si ferma, anchi lu cori di Gesù. Gesù abbassa la testa e mori. Ma unnè Diu nni lu duluri?

Quantu voti cci l'avemu chestu? Nni 'sta stazioni miditamu nquantu Gesù anchi ca si ntisi abban-nunatu, s' abbannunà a Diu.

.....

Tredicesima stazioni

Gesù veni scinnutu di la cruci e cunsignatu a la matri



Vidennu ca Gesù era già mortu, nun ci spizzaru li gammi, ma unu di li surdati lu culpisci nni un sciancu cu la lancia e sùbitu cci nesci sangu e acqua. Giuseppi d'Arimatea, ca era discepulu di Gesù, a l'ammucciuni pi timuri di li Giudei, chiedi a Pilatu si ssi putiva pigliari lu corpu di Gesù. Pilatu accunsintì a la richiesta.

.....

Miditazioni

Gesù è mortu, lu so cori veni trafittu di la lancia di un surdatu rumanu e cci nesci sangu e acqua: mistiriusa mmagini di lu sciumi di li sacramenti, di lu Battèsimu e di l'Eucaristia, di li quali, nforza di lu cori trafittu di lu Signuri, rinasci sempri. A iddu nun vennu spizzati li gammi, comu a l'atri du crucifissi; accussì iddu si manifesta comu lu veru agneddu pasquali, a lu quali mancu un ossu a va èssiri spizzatu.

E ora ca tuttu è statu supputatu, si vidi ca iddu, nunustanti tuttu lu turbamentu di lu cori, nunustanti lu putiri di l'òdiu e di la vigliaccheria, nun è rimastu sulu. Li fideli ci sunnu. Sutta la cruci c'èranu Maria, so matri, la soru di so matri, e lu discepulu ca iddu amava. Arriva puru n'omu riccu,

Giuseppi d'Arimatèa lu quali sippillisci Gesù nni
la so tomba ancora ntatta.

.....

Riflessioni

Cunsignà tuttu a lu patri. Ristà un corpu. Un corpu
ca veni cunsignatu a li discepuli e a Maria so matri.
Maria l'avi tra li vrazza lu corpu senza vita di lu
figliu. Na matri straziata, na matri pruvata nni lu
so duluri cchiù granni.

Quantu voti 'sta scena cumpari davanti a li nostri
occhi. Quantu matri cu li figli mbrazza figli nichì
o granni, figli pruvati di li dulura e di li suffirenzi,
ca jiunti a la fini di la loru esistenza si ritròvanu
fra li vrazza di li propri matri.

Un corpu ca parla, un duluri ca attraversa l'anima
di nna matri, ma ca pó divintari un duluri caricu di
nfinitu amuri si elaboratu nni la fedì e accoltunni
la spiranza.

.....

Quartordicesima stazioni
Gesù è misu nni lu sepolcru



Lu stessu, omu Giuseppi, pirsuna bona e giusta.
Scinnì Gesù di la cruci, lu cummiglià cu un linzolu
biancu e lu misi dintra na tomba scavata di na
roccia unni nun c'era misu ancora nuddu.

.....

Meditazioni

Gesù, disunuratu e ultraggiatu, veni dipostu, cu
tutti l'unuri, nni un sipòlcru novu. Nni lu mumentu
di la dipusizioni cumencia a rializzàrisi la parola
di Gesù: “Nverità, nverità, vi dicu: si lu chiccu di
granu cadutu nterra nun mori, rimani sulu; si nveci
mori, produci tanti frutti”.

Supra la sipultura di Gesù risplenni lu misteru di
l'Eucaristia.

.....

Riflessioni

Nta li vrazza di Maria a li vrazza di la matri terra.
Dda nni ddu sipòlcru. Nni nna tomba, nni un pezzu
di terra. Un corpu ca si ricungiunci cu la terra. Nun

nne un corpu di n'omu qualsiasi. È lu corpu di lu figliu di Diu.

Un semi ca sta pi germugliari, un semi ca cadutu nterra mori e porta fruttu. È lu semi di Diu ca nun pó ristari sipoltu nterra. A va purtari fruttu. A va spaccari lì petri di lu sipòlcru e risòrgiri lu terzu jornu. Aspittamu cu tripidazioni e spiranza. Ddi Dda tomba nun niscirà scunfittu ma vincituri nni la morti e sarà la morti di la morti, pirchè: "Forti comu la morti è l'amuri".

.....

Cunclusioni

Oh Diu, patri di misericordia e di buntà, a cunclusioni di 'stu pircorsu di duluri vulemu ringraziàriti, pirchè nni lu duluri cci hai manifestatu la to forza, nni la cundivisioni di lu duluri cci hai rivilatu comu tu si sempri a sciancu a natri, mai n' abbanduni e ogni iornu, n'ogni frati o soru ca soffri, tu si cu natri, tu, amuri vivu e veru ca regni nni li seculi di lì seculi.

.....

"L'autori Giuseppe Cardella, già nni lu 2007
scrissi 'sta poesia"

Prighiera

Addinucchiàtu 'nterra
a li pedi di 'sta cruci,
pregu a tia Cristu mio
pi dàrimi un segnu di paci.

Ti pregu cu amùri,
dammi fidi comu a l'atri,
pi crìdiri a tia, Signuri,
e l'Onniputènti Patri.

'Nchiuvàtu,
cu la curùna di spini 'n'testa
n'sanguliàtu, fragellàtu,
ti ficiru la festa.

Oh! Cristu, nuddu
di tia appi pietà;
t'ammazzàru
nun canuscènnu la virità.

La Matrùzza
a li tò pedi chianciva,
cu li làcrimi
li chiàghi ti vagnàva.

Dispiràta a mani giunti
gridàva: nun murìri!
Sarva 'stu munnu,
nun t'inni iri!

La luci di lu sulì 'ntra jornu,
tuttu 'nsemmùla s'astutà,
lu celu si vistì di niuru,
tuttu lu munnu trimà.

Lu poviru Crucifissu
sfinùtu, senza sciату,
isà l'occhi 'ncelu
e lu Patri ha 'mpluràtu.

Lampi, trona,
acqua e ventu;
l'occhi chiudìsti;
pi tutti fù un turmèntu.

Mortu ti scinnèru di la Cruci
c'un linzòlu e dù scali a lu latu

‘mbràzza ti piglià la povera Matri
stringènnùti a lu cori scunsulàtu.

Sistimàtu ‘nta lu sipòlcru
l’Adduluràta Matri la facci ti vasà,
facennùsi la cruci dissi:
sia fatta la tua volontà.

Dopo tri jorna a Gerusalèmmi
ci fù un gran scumpigliu
gridavànu tutti:
abbriviscì lu figliu!

“Gesù mortu ammazzàtu
è risuscitatu”
Ora sedi a la destra
di lu Patri tantu amàtu.

Ti ringràziu Cristu ca mi pinzàsti
la fidi ca nun avìa tu mi dasti.

.....

Gesù risorto



La risurrezioni

Lu terzu jornu di la so morti, Gesù risuscità a na nova vita. La so anima e lu so corpu trasfiguratu di la gloria di la so pirsuna divina, turnaru a unirisi. L'anima si uncì cu lu corpu. Pi chistu "La risurrezione di Cristu un nnè stata un ritornu a la vita tirrena.

La risurrezione di Gesù Cristu è lu fundamentu di la nostra fidi, datu, ca attesta ca Diu ntervinni la storia di l'omu pi sarvari tutti natri piccatura. Dici San Paulu:" Si Gesù Cristu nun nnè risortu è vana la nostra fidi".

.....



Giuseppe Cardella

Via Castelli, 36 - 92016 Ribera (Ag)

338 9652710

www.cardellaart.it - giuseppe@cardellaart.it

YouTube: Giuseppe Cardella

“Nvirità,
nvirità
iu vi dicu:
‘sta sira
unu di vatri
mi tradirà”.